

DOMENIE XXV «VIE PAL AN»

Antifone di jentrade

Jo o soi la salvece dal gno popul, al dîs il Signôr.
In cualsisei tribulazion mi clamaran,
jo ju scoltarai e o sarai il lôr Signôr par simpri.

Colete

Diu, che tu âs fondade dute la tô sante leç
sul amôr par te e pai fradis,
danus la gracie di meti in vore i tiei comandaments
par podê rivâ a la vite eterne.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Am 8,4-7

Cuintri chei che a comprin i puars cul arint.
Dal libri dal profete Amos
Scoltait cheste, vualtris che o tibiais il puar
fin a fâ sparâ i piçui de tierie,
disint: «Cuant passarae la lune gnove
par podê vendi il forment,
e la sabide, par podê puartâ fûr il forment,
scurtant lis misuris e ingrandint il sicli
e doprant staderis falsis,
comprant i biâts cul arint
e il puar par un pâr di sandui,
par podê vendi ancje il scart dal forment?».«
Il Signôr al à zurât pe supierbie di Jacop:
No dismentearai fin tal ultin
nissune des vuestris voris.
Peraule di Diu.

SALM RESPONSORIÂL dal Salm 112

R. Il voli dal Signôr al è parsore dal puar.

Laudait, fameis dal Signôr,
laudait il non dal Signôr.
Il non dal Signôr che al sedi benedît,
cumò e par simpri. **R.**

Il Signôr al è il plui alt, sore ducj i popui;
plui alte inmò dai cîi e je la sô glorie.
Cui isal compagn dal Signôr nestri Diu,
che là sù adalt si sente
e che a cjalâ jù si plee sui cîi e su la tierie? **R.**

Dal pulvin al tire sù il misar,
e il puar dal ledan al jeve,
par fâlu sentâ cui princips,
cui prins dal so popul. **R.**

SECONDE LETURE 1 Tm 2,1-8

Che si fasin preieris par ducj i oms a Diu che al vûl che ducj si salvin.

De prime letare di san Pauli apuestul a Timoteu

Benedet, ti racomandi, prin di dut, che si fasin suplichis, preieris, intercessions e ringraciaments par ducj i oms, pai rês e par ducj chei che a son in autoritât, par che o podìn vivi une vite cuiete e serene, cun dute la religjon e il rispiet. Di fat cheste e je une robe biele e che i plâs a Diu nestri salvadôr, che al vûl che ducj i oms si salvin e a rivin a la cognossince de veretât. Di fat Diu al è un sôl e ancje il mediatôr fra Diu e i oms al è un sôl, l'om Crist Jesù, che si è dât vie par riscatâ ducj. Cheste testemoneance lui le à dade tai temps stabilîts, e jo o soi stât metût so aralt e apuestul – o stoi disint la veretât e no conti bausiis –, mestri dai paians te fede e te veretât.

Par chel o vuei che i oms a prein pardut, alçant viers il cîl mans mondis, cence rabie e spirt di contradizion.

Peraule di Diu.

CJANT AL VANZELI cf. 2 Cor 8,9

R. Aleluia, aleluia.

Jesù Crist, di siôr che al jere, si è fat puar,
par che o deventassin siôrs in gracie de sô puaretât.

R. Aleluia.

VANZELI Lc 16,1-13

No podêts servî a Diu e al bêç.

Dal vanzeli seont Luche

In chê volte, Jesù ur disseve ai dissepui: «Un om siôr al veve un gastalt e chel al fo incolpât denant di lui di vêi sassinade dute la sô robe. Il paron lu clamà e i disè: Isal vêr ce che o sint a dî di te? Rint cont de tô ministrazion parcè che di cumò indenant no tu podarâs plui ministrâ. Il gastalt al disè dentri di sè: Ce aio di metimi a fâ cumò che il gno paron mi à gjavade la ministrazion? A sapâ no ài fuarce e a cirî la caritât no mi trai il cûr. O sai ben jo ce che o fasarai, par che, cuant che mi varan gjavade la ministrazion, mi acetin in cjase lôr. Al clamà un par un chei che a vevin debits cul so paron e i disè al prin: Tu, trop âstu di dâi al gno paron? Chel i rispuindè: Cent misuris di vueli. I disè: Cjape la ôt cjarte, sentiti e segne cincuante. Po i disè a di un altri: E tu, trop âstu di dâi? Chel i rispuindè: Cent misuris di forment. I disè: Cjape la ôt cjarte e segne otante. Il paron al laudà chel gastalt disonest, parcè che al veve savût messedâsi di furbo. Di fat i fîs di chest mont, tal tratâ cun chei de lôr stesse paste, a son plui svelts che no i fîs de lûs.

E jo us dîs: Fasêtsi amîs cu la ricjece ingrumade malamentri, par che, cuant che us vignarà a mancjâ, us acetin tes tendis eternis.

Chel che al è fedêl tes robis piçulis, al è fedêl ancje tes robis impuantantis; e chel che al è disonest tes robis piçulis, al è disonest ancje tes robis impuantantis.

Pa la cuâl, se no sêts stâts fedêi te ricjece sbalgjade, cui si fidaraial di dâus chê vere? E se no sêts stâts fedêi te ricjece di chei altris, cui us daraial la vuestre?

Nissun nol pò servî doi parons: o che al odeadà un e i volarà ben a di chel altri o che al varà miôr un e nancje nol cjalarà chel altri. No podêts servî a Diu e al bêç».

Peraule dal Signôr.

Su lis ufiertis

Acete vulintîr, Signôr, i regâi dal to popul,
par che al puedi vê, cui sacraments dal cîl,
ce che al professe cu la devozion de fede.

Par Crist nestri Signôr.

Antifone a la comunion Sal 118,4-5

Tu tu âs dât ordin, Signôr,
che i tiei decrets a sedin metûts ben in vore.
Che a sedin sigûrs i miei trois
par che o puedi meti in vore i tiei ordins.

Daspò de comunion

Compagne simpri, Signôr, cul to jutori
chei che tu ristoris cui tiei sacraments,
par che o podìn sintî i efiets de redenzie
tai misteris e te vite.
Par Crist nestri Signôr.